

AKASHVANI AIZAWL
REGIONAL NEWS BULLETIN
HEADLINES (MORNING)

Date – 01/12/2025

Time - 7:30 -7:40 Hrs

- Larsap General (Rtd) Vijay Kumar Singh an kum 100 chuang kaltaa chanchintha kenga Mizorama lokal Missionary te'n zirna, hriselna leh khawtlang nun chawikanna an rawn kentel rah chhuah chu tunah chuan hmuh theihin a awm mek a ti.
- Lai Autonomous District Council inthlan atana campaign hun chu vawiin hian a tawp dawn a, tlai 4 atangin Silent Period a intan ang.
- Prime Minister Narendra Modia chuan mipuiten police te an hmuhdan thlak turin insiamthat a tul thu a sawi
- Vawiin atangin Parliament thlasik thutkhawm tan a ni dawn.

<><><>

CATHOLIC CENTENARY

Larsap General (Rtd) Vijay Kumar Singh an kum 100 chuang kaltaa chanchintha kenga Mizorama lokal Missionary te'n Pathian thu mai ni lo, zirna, hriselna leh khawtlang nun chawikanna an rawn kentel rah chhuah chu tunah chuan hmuh theihin a awm mek a ti.

Mizoram Catholic Kohhrante'n kum 100 an tlin lawmna puala kumtluana programme hrang hrang an kalpui kharna inkhawm, Bishop's House Compound, Ramthar Veng, Aizawla neih a hmanpui na ah he thu hi sawiin Larsap General (Rtd) Vijay Kumar Singh chuan Mizoram Catholic Kohhranin kum 100 hmel a hmu ta chu lawmawm a tih thu sawiin an inpumkhatna, ralmuanna leh inngaihsaktawnnate hi mite'n Mizoram an ngaihsanna chhhan a ni, a ti a, Catholic Kohhran chuan Mizoram khawtlang nun, rinna leh ngaihtuahna siam dik kawngah a thawh hlawk hle tih a sawi.

Larsap chuan Catholic Kohhranin vantlang rawngbawlna, hriselna, zirna leh Kohhran dang nena inremna leh thalaite tihhmasawn kawnga an hmalaknate fakawm a tih thu a sawi a. Mizoram Catholic Kohhran member-te chu kum 100 dang lo la awm tur thlir chungah inpekna nena rawngbawlna chhonzawm tura chahin, thalaite nun kawng dika hruai tura kaihhruaina tha pe turte, tunlai thiamnate hmang tangkai deuh deuh turte, muanna leh inpumkhatnate chawilar zel tur leh mirethei leh hnuaihningte rawngbawl sak kawnga inpekna thar nei turte in a chah a ni.

Chief Minister Pu Lalduhoma pawhin thusawiin mirethei leh chanhaite chhawmdawlna kawnga Catholic Kohhran hmalakna fakawm tiin, Mizoramah Zoram Entu Pawl (ZEP) kaltlanga hna ropui tak an thawh thin thu a sawi a. Catholic Kohhran member Mizo hnam tana mi hlu takte chanchin tarlangin, ram hruaitu leh mi hmingtha tam tak an chherchhuah thu a sawi a. Mizoram tana hna ropui tak tak an thawh avangin an chungah state mipui aiawhin lawmthu a sawi a ni.

Byte : Chief Minister Pu Lalduhoma

Mizoram Catholic Kohhran hi February 1, 1925 khan din a ni a. Tun dinhmunah hian member 20,000 chuang an awm a ni.

<><><>

LABOUR CODE

Labour, Employment, Skill Development and Entrepreneurship Department Director Pu John Tanpuia chuan kuthnathawktute dan thar Labour Code hnuaia hnathawka mi chhawr tuten hriselna lam kaihhnawih health insurance eng emaw chen an tumsak tur a nih bakah hnathawktute dinhmun chawikanna tur a awm nual thu a sawi.

Akashvani palaiin a kawmnaah he thu hi sawiin Pu John Tanpuia chuan mi tupawh mimal dawr emaw thil siamchhuahna hmun nei emaw chuan an hnathawkte

appointment letter felfai tak an pek ve a ngaih tawh dawn thu a sawi a. Kum khata ni 180 thawk chin te chu hlawh kiam chuang lova chawlh (paid leave) an neih theihna tur te, hmeichhia leh mipa hlawh inang te, zan lama hmeichhia te hna an thawh theihna tur te leh hriselna kawnga a chhawrtute mawhphurhna hrang hrang Labour Code tharah a tel thu a sawi.

Pu John Tanpuia chuan ram pum huapin hnathawktuten dan thar chu an thatpui a rin thu sawiin India ram kum 2047-a ram intodelh leh ei leh bara hmasawn ber te zinga mi thlen a tum mekah pawh he dan thar hi thil pawimawh ber te zinga mi a nih dawn thu a sawi a. Mizoramah pawh hmathlir nei rana he danin a huam theih tur hnathawktute an lo thahnem zel theih nan sorkar hna chauh ni lo, industry tam zawk neih kawnga ngaihtuahna sen tul a tih thu a sawi a ni.

<><><>

LADC

Lai Autonomous District Council inthlan atana campaign hun chu vawiin hian a tawp dawn a, tlai 4 atangin Silent Period puan a ni ang.

Lai Autonomous District Council inthlan lo awm turah hian Lawngtlai DC leh District Election Officer Pu Donny Lalruatsanga chuan hriattirna tichhuakin inthlanna muanawm, thianghlim leh felfai alo awm theih nan vawiin tlai dar 4 atanga inthlan ni 3 tlai dar 4 thleng chu Silent Period atan a puang a, hemi hun chhung hian mimal emaw, pawl emaw, Political Party ang emaw a he inthlan kaihhnawiha Lai Autonomous District Council pawn lam atang Campaign kaihhnawih - vantlang punkhawm huai hawt leh neih emaw aurinna hman emaw phal ani tawh lova, LADC Area an chhuahsan vek tur anih thu a sawi a ni.

Member 25 awmna Lai Autonomous District Council (LADC) inthlan lo awm tur atan a inbuatsaihna kal zelah hian District Election Officer Pu Donny Lalruatsanga chuan inthlanna buaipui tur Official ten Vote an thlak ah, diktak a Vote thlak chu an ngai pawimawh hle tih sawiin, Official zawkte thil diklo leh rinleh theiha an awm theihna remchang awm thei apiang chu a theih ang anga en ulukin ruahmanna siam a ni tih a sawi.

Inthlanna buaipui tur Polling Party, hmun hla zawk pan turte chuan vawiin hian Lawngtlai an chhuahsan ang.

<><><>

MIZO TERRITORIAL ARMY

Mizo Territorial Army hna lak kal mekah hna diltu pre-recruitment kal mekte chuan an hlawkpui thu Akashvani an hrilh.

Akashvani palaiin a kawmnaah pre recruitment training zawm mek tu HK Lalhruiatluanga chuan thla hmasa chhungin hna an dil mekah training a zawm ve thu leh a hlawkpui thu a sawi a. Physical leh medical test a paltlang tawh thu sawiin Mizoram Youth Commission thahnemngaihna naktuk December ni 1 atanga ni 19 thleng written exam an hmachhawn tur atang coaching an buatsaih dawn thu leh zawm ngei a tum thu a sawi a ni.

Mizo Territorial Army hna diltu zinga mi Hmingthanzauva pawhin Akashvani News Aizawl zawhna chhangin pre recruitment training a kal ve mek thu a sawi a. Assam Regiment te coaching an pek chu a hlawkpui thu sawiin hotute thahnemngaihna hnuaiah written exam hmachhawn thei turin physical leh medical zawng zawng a paltlang thei chu lawmawm a tih thu a sawi a ni.

Mizo Territorial Army hna dil mek tu Lalruatfeli Chinzah pawhin pre recruitment training a kal mek thu a sawi a. Thla khat chuang zingkar hma taka thoin training an neih thu leh hmasawna tam tak a nunah a thlen thu a sawi a. Mizo Infantry Battalion-a hmeichhia bik a vawikhatna tur a nih avangin phurawm a tih thu a sawi a ni.

Akashvani palaiin a kawmnaah Mizo Territorial Army lak hna thawk mek tu leh pre recruitment training nei mek tute enkawltu 166A Infantry Battalion Home & Heart

Territorial Army, Aizawl Company Officer in Charge Lt. Col. Goldi Bora chuan Mizo Territorial Army hna chu mi 2700 chuangin an dil thu leh heng zingah mi tam takin physical leh medical test te an paltlang tawh thu a sawi a. Kumthar January ni 18-ah written exam an buatsaih dawn thu sawiin hemi atan pawh hian MYC te nen tangkawpa hna diltute a tha thei ang bera buatsaih zel an tum thu a sawi a ni.

<><><>

NEWS

Akashvani Aizawl Regional News Unit in Aizawl, Hnahthial, Chawngte, Vairengte leh Champhai North atana Part Time Correspondent a lak tur te interview chu Dec ni 3-ah neih a ni dawn a, diltute chu Dec ni 3 chawhma dar 10.30 ah document kimchang nen Office ah thlen kim tur a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan mipuiten police te an hmuhdan thlak turin insiamthat a tul thu a sawi. Nimina All India Conference of Directors General and Inspectors General of Police vawi 60 naah he thu hi sawiin Police zingah abik takin thalai zawkte an hnaah chiang thar sela, ngaihtuahna nasa zawk seng a, mamawh huna chechhuak zung zung thei tura inbuatsaih a tul thu a sawi. Prime Minister Modia chuan University leh zirna in dangte chu hnuchhui kawnga forensic tangkaina zir uar tura chahin hei hian ramchhunga misual hnuchhui dan a ti chak dawn a ti a. Hei bakah hian dan pawna hnawl hel leh pawl dangte vil ngun a tul tih sawiin Left Wing Extremism ho chetna hmun luhchhuah a tul thu sawi bawkin tuipui chhehvel venhimna kawngah thil thar ti chhuak thiam turin Police officer rualte a sawm bawk a ni. (byte)

Prime Minister Narendra Modia hian Intelligence Bureau officer te hnenah an hnathawh that avanga chawimawin President's Police Medals for Distinguish Service a sem bawk a ni.

All India Conference of Directors General and Inspectors General of Police vawi 60-na hi Chhatisgarh-a Raipur ah neih a ni a.

Kuminah hian thupuih Viksit Bharat: Security Dimensions tih chu hman a ni a. Ram chhunga Police te dan leh thupek kenkawh dan dinhmunte, ramchhung himna chungchangte, firfiaka chetna do dan tur te, Left-Wing Extremism lamte, disaster Management, hmeichhe himna, leh forensic science leh artificial intelligence chungchangte ngaihtuah ho a ni ang.

<><><>

PARLIAMENT

Vawiin atangin Parliament thlasik thutkhawm tan a ni dawn. Kan Correspondent sawidanin tun tum session ah hian ni 19 chhungin tum 15 an thukhawm dawn a. Bill 13 lutin heng zingah hian National Highways (Amendment) Bill, Atomic Energy Bill, Corporate laws (Amendment) Bill, Insurance Laws (Amendment) Bill leh Higher Education Commission of India Bill-2025an tel a. Lok Sabha ah chuan Union Finance Minister Nirmala Sitharaman-i chuan Central Excise (Amendment) Bill leh National Security Cess Bill, 2025 a pulut dawn a. Supplementary Demands for Grants 2025-26 atan sawihoa pass tum a ni bawk ang.

Nimin khan sawrkar laipui chuan New Delhi-ah Parliament Session tur pual hian political party tin aiawh inhmukhawm a ko a. He hunah hain Defence Minister Rajnath Singh chuan kaihruiin Political party 36 atangin hruaitu 50 an tel a ni.

<><><>